

**KANTON SARAJEVO****SKUPŠTINA KANTONA SARAJEVO****NAROD I PRAVDA****Arijana Memić, zastupnica****Vlada KS****Ministarstvo zdravstva KS****PREDMET: INICIJATIVA**

**Inicijativa za finansiranje popravke podova i krova bolnice, nastavka rekonstrukcije liftova i obezbjeđenje kadra za projekat razduživanja lijek-pacijent u Javnoj ustanovi Opća bolnica “Prim. dr. Abdulah Nakaš”**

### **Obrazloženje:**

Javna ustanova Opća bolnica “Prim. dr. Abdulah Nakaš” (u daljnjem tekstu “Opća bolnica”) u Sarajevu postoji već od 19. stoljeća. U tekućoj godini, kroz specijalističko-konsultativnu službu Opće bolnice realizirano je oko 428.500 pregleda i pruženo oko dva miliona zdravstvenih usluga. Urgentni centar uradio je oko 33.400 pregleda.

U MRI (magnetna rezonanca) dijagnostici Opća bolnica uradila je naročiti iskorak, u odnosu na raniji period, te u ovoj godini bilježi 5.477 pregleda. Veliki iskorak napravljen je i u oblasti gastroenterologije, kao dijelu interne medicine i imaju pacijente iz raznih dijelova BiH.

U ovoj godini zabilježen je veliki protok pacijenata, a uz kvalitetnu uslugu smanjena je dužina trajanja bolničkog liječenja. Urađeno je skoro sedam hiljada operativnih zahvata te niz novih metoda u svim segmentima. Broj hospitaliziranih pacijenata je povećan za 70 % ,a popunjenost Opće bolnice je najveća u njenoj dosadašnjoj historiji. Ukupan broj prijema na hospitalizaciju iznosi 15.103.

Opća bolnica “Prim. dr. Abdulah Nakaš” u proteklim godinama posluje pozitivno, kao i da je Vlada Kantona Sarajevo u više prilika podržala napore Opće bolnice, a od velikog je značaja za sve građanke i građane našeg Kantona i šire.

Smatram da dobar i predan rad treba nagraditi i podržati, a Opća bolnica je jedna od svijetlih primjera javnih ustanova Kantona Sarajevo. Shodno tome i na osnovu mojih saznanja, predlažem sljedeće inicijative, kako bismo i u buduće podržali napredak i dobro poslovanje Opće bolnice:

1. U Javnoj ustanovi Opća bolnica “Prim. dr. Abdulah Nakaš” se uvodi projekat zasnovan na razduživanju lijek-pacijent, zahvaljujući kojem bi se ubuduće znao tačan utrošak lijekova po pacijentu, što je trenutno nemoguće utvrditi u potpunosti. Software koji će u tu svrhu biti korišten je već kupljen. Također je spreman i plan na koji način će se projekat sprovesti odnosno po kojem je planiran daljni rad na razduživanju lijek-pacijent. Primjera radi, da je ovaj projekat bio realiziran već 2022. godine, kada je plan javnih nabavki predvidio nabavku lijekova u iznosu većem od 12.000.000,00 KM, moguća ušteda na osnovu realizacije projekta bi bila i do 3.000.000,00 KM. To je ujedno i iznosi koji bi se realizacijom ovog projekta mogao uštedjeti na godišnjem nivou. Za realizaciju projekta potrebno je obezbijediti kadar i to 4 uposlenika za razduživanja lijekova. Neto plata ukupno za sva četiri uposlenika, sa doprinosima za 12 mjeseci iznosila bi **116.182,08 KM**, za što su potrebna dodatna sredstva.

S obzirom da se radi o projektu koji je pred samom realizacijom, a bio bi od velike koristi kako strateški, tako i finansijski za Opću bolnicu, jer bi se ostvarila milionska ušteda na godišnjem nivou, a realizacijom projekta približilo evropskim standardima, podnosim ovu inicijativu na razmatranje resornom ministarstvu tj. Vladi Kantona Sarajevo.

2. Podovi u objektu Javne ustanove Opća bolnica “Prim. dr. Abdulah Nakaš” su djelimično renovirani, međutim većinski su u jako lošem stanju. U zdravstvenoj zaštiti i organizaciji bolničkog liječenja, intrahospitalne infekcije (infekcije koje pacijenti ili osoblje dobiju tek boravkom u bolnici) predstavljaju sve važniji problem, a jedan od danas poznatih uzroka su i nečisti podovi, kao i podovi u lošem građevinskom stanju. Takve infekcije u prosjeku produžavaju hospitalizaciju za 5 do 10 dana, što je prije svega rizik za pacijente, ali također znači i duži potreban tretman, više lijekova te samim time i veće troškove. Po predračunu za zamjenu trenutnih podova, potrebna je jednokratna investicija u iznosu od **899.971,34 KM**.

3. Krovovi nebodera objekta Javne ustanove Opća bolnica “Prim. dr. Abdulah Nakaš” zadnji put su popravljani 1997. godine. Krovovi redovno prokišnjavaju, što predstavlja rizik od štete na aparatima visoke vrijednosti. Za popravku krovova po predračunu je potrebna jednokratna investicija u iznosu od **150.000,00 KM**.

4. Liftovi u objektu su zamjenjeni posljedni put također 1997. godine, a u 2022. godini je urađena djelimična rekonstrukcija. Zamjenjena je elektronika liftova, ali je potrebno zamijeniti i kabine. Za zamjenu kabina liftova po predračunu je potrebna jednokratna investicija u iznosu od **394.077,06 KM**.

Svaka od ovih investicija bi značila veliku i istinsku pomoć za Opću bolnicu, a samim time i za sve građanke i građane našeg kantona.

Upućujem ove inicijative resornom ministarstvu odnosno Vladi Kantona Sarajevo na razmatranje u smislu planiranja budžeta Kantona Sarajevo za 2023. godinu.

**Sarajevo, 30.12.2022.g**

**Zastupnica u Skupštini KS**

**Arijana Memić**